

Cambionan den Village lo trece mas espacio y siguridad pa peatonnaan



Un bista di e anochi aki caminda ing. Raffy Kock y Inspector Halley a suministra habitantenan di Village cu informacion riba cambionan pa embeyece e area

ORANJESTAD – Village lo bay haya un miho conexion di trafico na e areanan principal, y peatonan lo por bay cana mas tranquil sin preocupacion di autonan cu ta core cu velocidad halto. Esaki ta e principal cambionan cu kier trece den e bario di Village cual a wordo splica na nan durante un anochi di informacion cu a tuma luga diarason ultimo na Postkantoor San Nicolas. E renobacion di Village ta forma parti di e cambionan cu lo wordo haci pa embeyece e area den cuadro di e plan BoAruba. Bou di e plan aki, diseña door di Gabinete Mike Eman ta inclui renobacion di 21 bario di Aruba. Diaranson anochi a tuma lugar e prome anochi informativo organisa pa e team di Bo Bario na oficina di Post Aruba NV. Poco poco e sala a yena cu habitantenan y tambe algun comerciante cu ta

biba y traha den e bario aki y cu a mostra interes pa cu e proyecto. Sr. Ir. Raffy Kock di Infra Team di Ministerio di Infraestructura, a guia e anochi aki splicando e diferente aspectonan di BoBario, esta e aspecto di renobacion di infraestructura y e proceso social cu ta vincula na esaki cual lo mester ta cla prome cu fin di e aña aki. Siguientemente a splica e cambionan cu lo tin den Village mustrand e situacion actual, unda por a mira cu e bario di Village ta isola pa trafico den partinan importante. Cu e proyecto nobo lo mehora e accesibilidad di Village via e Promenade, Torenstraat y/of Teaterstraat pa medio di un rotonde. Tambe a splica e cambionan mas grandi cual ta e cambio di direccion di Sint Maartenstraat pa un direccion di pabou for di e rotonde bay ariba. A yega

na e solucion aki basa riba rapportnan haci pa varios departamento y di parti di e proceso di Renobacion Urbano 2, unda cu tabata tin keho di trafico cu ta core cu velocidad halto riba e caya aki y unda cu door di e cercania di e entrada di e casnan pa cu e caminda actual (tin biaha di menos cu un meter) a opta pa balansa e caminda di forma cu lo tin mas espacio di trottoir entre e porta di cas y e caminda. Esaki combina cu parkeerhavens y elementonan pa baha velocidad di trafico lo logra un caya mas espacioso y sigur unda lo tin hasta lugar pa planta algun mata pa sombra. Bayendo mas den detaye a muestra e diferente area publico cu lo haya atencion y mehoracion, entre otro e plasa Village fase 1, cual ta situa dilanti oficina di Post, e area rond di Basketball Court, e plenchi banda di Saco di Felipe y finalmente e rotonde cu lo regla e trafico cu ta drenta Sint Maartenstraat. Atencion special a ser duna na e rotonde cu lo ta construi pariba di edificio di Texas na final di Promenade, cu a ser diseña di tal manera cu e lo mehora e situacion di paso di carnaval den e punto aki tanto pa e trailer y carozanan como pa e publico door di ofrece mas espacio den e trottoir for di unda por aprecia e festival aki. Trottoirnan mas hancha tambe ta nifica mas y miho espacio pa peatonnaan.



Esaki ta un diseño di e rotonde cu lo cuminsa construi dialuna awor, entre ex edificio di DOOV y ex edificio di Texas, y por mira na banda drechi con a habri e caminda pa drenta Sint Maartenstraat



Lo bay planta basta mata pa duna sombra y pone banki den un parke pa e ciudadanonan por sinta tuma fresco.

Sr. Halley di KPA San Nicolas tambe a atende e reunion pa contesta preguntanan y di su mes a duna splicacion riba e cambionan di trafico tanto alrededor di e rotonde como den e parti di e bario di Village. Na final di e anochi a atende cu e habitantenan y contesta preguntanan cu a ser haci. Tabata tin varios pregunta tocante e

direccionnan di trafico y Sr. Kock en conhuntto cu Sr. Halley a duna contesta riba e preguntanan. Despues di e sesion conhuntto, e team di BoBario a atende cu diferente habitante y algun comerciante riba nan preguntanan specifico unda cu a tuma nota di sugerencia y criticanan cual lo ser evalua y pa tuma den consideracion pa cu e proyecto. E team di BoBario kier gradici tur e partnernan cu a atende e reunion y specialmente esnan cu activamente a yuda pa organisa un anochi informativo di un manera hopi profesional, esta Post Aruba NV y departamento audiovisual di Biblioteca Nacional di Aruba. Tambe un danki special na Stichting Vision Nobo Juana Morto Complex cu a yuda cu stoelnan pa e prome di varios anochi informativo cu lo ser teni den cuadro di e proyecto aki. □